



Bosnia and Herzegovina
STATISTICAL COUNCIL OF
BOSNIA AND HERZEGOVINA

Broj:11-07-3-40-3/18
Sarajevo, 14.02.2018. godine

ZAPISNIK

sa 3. sjednice Vijeća za statistiku BiH

Dana 20. 12. 2017. godine sa početkom u 11:00 sati u prostorijama Agencije za statistiku Bosne i Hercegovine, održana je 3. sjednica Vijeća za statistiku BiH.

Sastanku su prisustvovali članovi Vijeća za statistiku BiH:

Gospodin Velimir Jukić, direktor Agencije za statistiku BiH,
član Vijeća za statistiku Bosne i Hercegovine;

Gospodin Fadil Fatić, zamjenik direktora Agencije za statistiku BiH,
član Vijeća za statistiku Bosne i Hercegovine;

Gospodin Miljan Popić, zamjenik direktora Agencije za statistiku BiH
član Vijeća za statistiku Bosne i Hercegovine;

Gospodin Amir Hadžiomerađić, Centralna banka BiH,
član Vijeća za statistiku Bosne i Hercegovine;

Gospođa Mira Vujeva,
član Vijeća za statistiku Bosne i Hercegovine;

Gospodin Sahrudin Sarajčić,
član Vijeća za statistiku Bosne i Hercegovine;

Gospođa Senija Fačić, rukovodilac podružnice Brčko distrikta BiH.
član Vijeća za statistiku Bosne i Hercegovine.

Odsutni su bili: Gospodin Boris Raić, Ministarstvo finansija i trezora BiH, Gospodin Emir Kremić, direktor Federalnog zavoda za statistiku, Gospođa Radmila Čičković, direktor Republičkog zavoda za statistiku RS.

Sjednici je prisustvovao i gospodin Enes Hadžiefendić.

Tačke dnevnog reda:

- 1.Usvajanje zapisnika sa 2.sjednice
- 2.Plan rada Agencije za statistiku BiH za 2018. godinu
- 3.Razno

Zapisnik:

Direktor Agencije za statistiku BiH gosp. Jukić pozdravio je prisutne i utvrdio postojanje kvoruma. Dnevni red je jednoglasno usvojen.

Gospodin Fatić je napomenuo kako ponašanje određenih članova Vijeća nije prihvatljivo i profesionalno u kontekstu nedolaska na sjednice Vijeća, jer to usporava kvalitetano obavljanje poslova ovog tijela.

Ad 1. Oko predloženog zapisnika vodila se diskusija. Komentare na zapisnik imala je gđa Čičković, i gđa Vujeva, dostavljeni komentari su prihvaćeni i zapisnik je jednoglasno usvojen.

Ad 2. Gosp. Jukić je naveo kako treba diskutovati i razmotriti određene stavove po pitanju Plana rada Agencije za statistiku BiH za 2018. godinu, ali da svoje mišljenje Vijeće treba dati na narednoj sjednici kada budu prisutni i članovi koji su bili spriječeni da prisustvuju 3. sjednici Vijeća, prisutni su se složili.

Gosp. Hadžiefendić je pripremio obrazloženja i odgovore na sva postavljena pitanja od strane članova Vijeća koja su postavljena na 2. sjednici Vijeća.

Komentari gđe Radmile Čičković se odnose na: Obavezu dostavljanja elektronski nepročišćenih (sirovih) baza podataka za anketna istraživanja; utvrđeni vremenski rok za dostavu podataka statistike nacionalnih zdravstvenih računa i potrebu donošenja odgovarajućih zakonskih rješenja vezano za provedbu aktivnosti na Popisu poljoprivrede.

Smatra da se i ostali komentari (od ukupno 48 dostavljenih od strane RZS-u) koji su dostavljeni Agenciji (riječ je o 6 komentara - odnosno 3, obzirom da se 3 komentara odnose na istu problematiku) trebaju prihvatiti, jer su po mišljenju RZS veoma važni.

Odgovorne osobe iz Agencije koje su odgovorne za navedene statističke domene smatraju da se ove sugestije ne mogu prihvatiti, što je već bilo prethodno i pojašnjeno.

Gosp. Amir Hadžiomerađić je tražio pojašnjenje određenih pojmova koji su korišteni u Planu rada za 2018. godinu. Riječ je o korištenim terminima za nazive prioritetnih statističkih oblasti BIZNIS i LJUDI I DRUŠTVO, za koje smatra da nisu dovoljno razumljivi i uobičajeni za ovdašnje prilike. Agencija je u Planu koristila termine iz Kompendijuma statističkih zahtjeva 2016.

Ova sugestija gosp. Hadžiomerađića je prihvaćena i novi termini su: POSLOVNE STATISTIKE i LJUDI I DRUŠTVO - DEMOGRAFIJA I SOCIJALNE STATISTIKE

Gosp. Sahrudin Sarajčić i gosp. Fadil Fatić su mišljenja da u Planu rada za 2018. godinu trebaju biti navedene planske aktivnosti oko narednog Popisa stanovništva, posebno u smislu pripremnih aktivnosti, te obaveza BiH koje proizilaze iz ispunjavanja uslova prema EU. Ovaj prijedlog su svi prisutni prihvatili.

Gosp. Sahrudin Sarajčić postavio je pitanje u vezi NUTS-a (nomenklaturu teritorijalnih jedinica za statistiku) u cilju dopune plana rada BHAS-a u 2018 godini sa planiranim aktivnostima na ovom planu, te dobijanja zvanične informacije za narednu sjednicu Vijeća za statistiku BiH koja je planirana za kraj mjeseca januara 2018. godine.

Ekonomsko i socijalno vijeće UN (ECOSOC) donijelo je u junu 2015. godine Rezoluciju br. 2015/10, kojom se sve države članice UN pozivaju da u periodu 2015-2014. provedu najmanje jedan popis stanovništva. Popis u 2021. godini provešće sve države članice EU (Uredba 763/2008 Evropskog parlamenta i Vijeća za popise stanovništva i stambenih jedinica, s ciljem da se osiguraju metodološki harmonizirani i vremenski uporedivi podaci na međunarodnom nivou i time omogućiti razmjena podataka između zemalja.

U planu za 2018. je navedeno da će analiza rezultata popisa 2013. poslužiti kao osnova za izradu metodoloških rješenja za naredni popis stanovništva. Neophodno je da menadžment Agencije i entitetskih zavoda za statistiku odredi koje godine se planira provesti naredni Popis, odnosno izvršiti pripremne aktivnosti na provođenju Popisa stanovništva, domaćinstava i stanova u BIH u popisnom ciklusu 2020. godine.

Gđa Mira Vujeva je preporučila da se na web stranici Agencije korisnicima učine dostupne baze statističkih podataka, kao što je to omogućeno na web stranicama entitetskih zavoda za statistiku.

Trenutna dostupnost statističkih podataka u vidu baze podataka se svodi na nekolicinu pojedinačnih projekata, međutim nova web stranica će tokom 2018. godine biti obogaćena novim sadržajima u vidu online baza podataka, odnosno uspostavljanju naprednije i savremenije online diseminacione baze podataka što će kao rezultat krajnjim korisnicima omogućiti interaktivan i kvalitetan pristup statističkim podacima u tabelarnom obliku, kao i mogućnost samostalnog generisanja tabela (sa predefinisanim varijablama) za određene statističke oblasti.

Također će biti omogućena aktivna komunikacija putem društvenih medija Facebook i Twitter u skladu sa Strategijom online komunikacije koja propisuje dvije do tri objave sedmično putem svakog od navedenih kanala. Pored objava, komunikacija uključuje i odgovore na postavljena pitanja putem društvenih medija.

Kod prioritenih zadataka za 2018. unutar INSTITUCIONALNOG OKVIRA naveden je cilj ali ne i aktivnosti koje će se poduzeti u ovoj oblasti i predlaže dopunu.

Sugestija je prihvaćena- novi tekst glasi:

Planirano je da se prijedlog izmjena Zakona o statistici ponovo aktuelizira ili da se na inicijativu Agencije pristupi izradi novog Zakona o statistici BiH. Neophodno je uvesti nove mjere i instrumente usklađivanja sistema službene statistike BiH sa Evropskim statističkim sistemom (ESS) kroz prilagođavanje evropskom pravnom okviru, te potrebu uvođenja jednostavnijeg normativnog rješenja organizacije i funkcioniranja sistema službene statistike BiH.

Cilj poboljšanja zakonskog okvira je osiguranje daljeg razvoja statističkog sistema, usklađenog sa pravnim okvirom Evropske unije i prilagođenog potrebama u BiH.

Smatrala je da se planski dokumenti (u ovom slučaju Plan rada za 2018.) učini dostupnim javnosti za komentare, primjedbe i sugestije.

Sugestija je sasvim na mjestu i obaveza komuniciranja i konsultiranja s javnosti vezano za plansko-programske dokumente se već par godina realizira u Agenciji vezano za donošenje Srednjoročnog plana rada za trogodišnji period i godišnji Program rada Agencije. Nažalost, obzirom na vremenski termin izrade i donošenja Plana rada za 2018. godinu, nismo u mogućnosti ovo realizirati u ovoj godini.

Vezano za NUTS (nomenklaturu teritorijalnih jedinica za statistiku) sugestija je da u sadržaju rada nije navedeno koje se aktivnosti planiraju poduzeti i nema naznake kada se može očekivati izlazni rezultat ove aktivnosti.

Kolegica koja je odgovorna u Agenciji za statistiku BiH za ovaj domen smatra da nije moguće utvrditi kada se može očekivati izlazni rezultat ali je svakako plan da se ove aktivnosti završe u narednoj godini.

Tekst koji se odnosi na NUTS a koji je dostavljen Pododboru za transport, energiju i regionalni razvoj - 30. novembar 2017. Banja Luka.

„Agencija za statistiku BiH je u 2013. godini dostavila Eurostat-u Prijedlog klasifikacije statističkih teritorijalnih jedinica u BiH, koja opisuje NUTS 1 i NUTS 2 nivo.

Eurostat je prihvatio prijedlog kao radni osnov i smatra privremenim predloženi nivo NUTS 2 i serije podataka o BDP-u po stanovniku za NUTS 2, sve dok se u potpunosti ne uspostavi Klasifikacija statističkih teritorijalnih jedinica koja uključuje i nivo NUTS 3. Tri statističke institucije su postigle dogovor o nastavku aktivnosti na izradi Prijedloga klasifikacije statističkih teritorijalnih jedinica. Rad će se nastaviti na entitetskom nivou i nivou Brčko distrikta BiH. Nakon dobijanja prijedloga od strane entitetskih statističkih institucija i usklađivanja sa EU legislativom, Agencija za statistiku BiH će ga dostaviti Eurostatu na razmatranje.“

Dostupnost podataka o BDP u PPS za nivo entiteta (standard kupovne moći).

Vežano za izračun BDP po stanovniku u PPS (Standard kupovne moći) potrebno je osigurati sljedeće podatke:

- Zbir stanovnika na entitetima i BD BIH mora biti jednako objavljenom broju stanovnika za BiH (potrebna serija podataka).
- Obračun Standarda kupovne moći računa Eurostat na bazi BDP procjenjenog rashodnim pristupom, a koji se procjenjuje za potrebe PPS samo za BiH. Obzirom da je ovaj BDP veći od BDP procjenjenog proizvodnim pristupom za oko 3%, potrebno je izvršiti balansiranje dva pristupa, a tek nakon toga Eurostat može izračunati nove koeficijente za BiH koji će se primjeniti na proizvodni BDP raspoloživ na entitetskom nivou (NUTS II).
- Kada će se balansiranje moći napraviti ovisi od više faktora (o ovome će se razgovarati sa EU ekspertom I IMF ekspertom u narednim mjesecima kada su planirane misije).

Nakon opširnih pojašnjenja gosp. Hadžiefendića prisutni su diskutovali. Predloženo je da se Plan usvoji sa gore navedenim korekcijama na sljedećoj sjednici, koja će se održati krajem januara 2018. godine.

Gosp. Popić smatra da nema potrebe Planom definisati pravni okvir (bilo da se o zakonu, metodeologiji ili nekom drugom rješenju) za Popis poljoprivrede, nego da to treba definisati i doći do zajedničkog rješenja kroz razgovore između statističkih i drugih nadležnih institucija.

Gosp. Fatić je još jednom istakao da smatra da je metodologija rada na NUTS3 nejasana, pravno neutemeljena te da ne postoji formalizirana procedura rada mehanizma koordinacije po pitanju NUTS3.

Gosp. Jukić je naveo da nije poznato kojim tempom i na koji način radi mehanizam koordinacije, ali da u koliko nakon određenog vremena ne bude rezultata, treba na drugi način doći do rješenja.

Zaključeno je da treba tražiti izvještaj o poduzetim aktivnostima i postignutim rezultatima od predsjedavajućih mehanizmom koordinacije, gosp. Emira Kremića za period kada je bio predsjedavajući te od gđe Radmile Čičković koja je trenutno predsjedavajuća.

Pitanje oko aktivnosti na NUTS3 (u kontekstu nadležnosti), treba uputiti i Direkciji za evropske integracije.

Također je zaključeno da se formira radna grupa, (u sastavu od institucija koje učestvuju u aktivnostima oko NUTS klasifikacija), koja će menadžmentu dostaviti informacije o planu i načinu rada sa jasnim rokovima za izvršavanje aktivnosti na NUTS3.

Gosp. Sarajčić predložio je da se za narednu sjednicu Vijeća za statistiku BiH pripremi korigovana verzija Plana rada BHAS za 2018. godinu, te da ista da bude spremna za razmatranje i usvajanje na narednoj sjednici Vijeća za statsitiku BiH.

Ad 3. Gosp. Jukić je upoznao pirsutne da bez obzira na probleme kroz koje prolazi Agencija, mjereno kroz razmjenu podataka zabilježen je porast kvantiteta i kvaliteta podataka dostavljenih Eurostatu u 2017. godini.

Sjednica je završena u 13 sati i 00 minuta.

Zapisnik sastavila:
Sekretar Vijeća za statistiku BiH

Anida Fazlić-Hadžić



Predsjedavajući Vijeća za statistiku BiH



Sahrudin Sarajčić